

先游傳叙

親朋執友之間。日夕追隨。抒其情素。叙其閱歷。其或一人湓先。則衆相嗟悼。經數年所。而尙想其風度。語其嘖咲而不措。及其彌遠也。其相與嗟悼者。亦皆後先淪謝。則雖欲追遠而無復可與告者。則獨自惘然焉耳。及數十年之後也。獨自感念者。亦漠然也可知矣。寄相識于天下。待知己于百世者。其唯君子乎。其人已陳而其名尙新。其神會機契者。傾企勉慕。千載不朽。親也父母。尊也神明。豈徒然乎哉。昔者先君子述古倡道。當日親朋之過從。弟子之親炙者。垂四十禩。而音塵日隔。今已二紀餘。而多不在焉。昔者柳儀曹傳先友。而勒之石背。凡六十七人。唐書有傳者二十人。可謂盛矣。與先子交且從者。不朽之業。固雖讓其美。而一時相信之厚。在當時亦可謂翹翹者矣。子之事親也。事亡如事存。思其咲語。思其嗜欲。婢子之賤。杯圈之微。尙不敢慢而蔑之。況其親厚者而可弗追憶其丰神哉。欲使後世子孫之欲念爾祖者。知親舊門人之名貫事行。作

先游傳。凡朝紳之禮。下者不敢援也。交之淺與不終者不載也。身今存者不錄也。因其子弟而識者不及也。予之不及詳知者不舉也。得若干人。記其大略云。

享保十四年己酉七月

伊藤長胤叙

先游傳

伊藤長胤述

井上養白

丹州穗津人。受醫業于有馬玄哲。遂爲僮。後宦越藩。事大安侯。甚被眷遇。天資滑稽。有機辯。先子少壯時。卻掃誦古。素無親識。唯與養白友善。日夕會集。互相切劘。大安侯之知先子。亦養白爲之先容云。

林宗孝

又名順。稱源太郎。京師人。與羅山同族。弱而慧。如成人。力學有深沈之思。與先子隣。少相從遊。後隱于藤森。淡泊自甘。寶永□年。七十餘歲而終。其子景范。請予題墓。因表曰貞逸先生云。

米川常伯

京師人。善聞香辨其品。嘗與先子交。先子稱其妙契。以勵學子。

緒方元眞

世貫于京師。以豪聞。好讀書。人品不凡。與活所。坦菴諸老相師友。甚好唐詩選。七絕格調高古者若干首。取舍數番。請當時能書人分寫。貼諸屏障。後人輯曰屏風詩選。與先子友善。於先妣爲堂兄。寬文中卒。齒未強仕。

深尾某

初曰伊知地傳七。京師人。失名。先子始開門授徒。首而投謁。自負以比顏路。後爲王朝官吏。爲縫殿丞。隱于五地山南趾。其兄山形加賀守宗房。學術雖不契。而亦服先子行義。弟山口宮内友昌。久從先子。甚信古學。

大須賀宗節

後號哲齋。快菴之族子也。京師人。後爲醫。寓于備前。卒于江戶。

長谷川宗寅

先子叔父輝直事池田家。食邑播州新宮。宗寅其邑人也。遊學京師。因寓于塾。後爲醫。改姓名曰三村道智。仕作州森侯爲掌醫。□□年中侯國除。遂僑寓

于大坂。

小河承意

稱庄兵衛。京師人。住于中立賣街。家素殷實。承意天資豪蕩。不治生產。遂致屯艱。後卜築北野。灌園百畝以自娛。善書好倭歌。先子故人也。有二子。曰成章。成材。從學于先子成名。

中村宗次

稱長兵衛。世家京師。住下立賣街。裁卉嗜茗。素有雅趣。後家道衰謝。隱居于藤森。時時過訪先子家。晤語移晷。雖不博文。亦有志之人也。

水口周菴

京師人。天資謹篤。善醫。遊于江戶。事板倉筑州侯。好古今典故。多蓄文籍。素信先子之道。與立所友善。嘗作一書。叙性理之說。非古聖之教。專演先子之旨。既歿。其家以遺命贈予云。

伊藤宗恕

號坦菴。又號自怡堂。京師人。與先子同宗。學于活所之門。爲巨擘。壯而宦越藩。事大安侯。甚被器待。天資豪邁。博洽善屬文。旁通庶務。多所詣究。善隸書。法度森然。世所珍尙。好膽異書。多藏于家。晚年告休在都下。與冬嶺及先子。時俱耆年。衆所推重。甚負名望。□□□年卒。壽八十六。有詩集二卷。其子元熙屬予爲叙。

村上友侗

號冬嶺。丹州保津大姓。治小方脉術。甲當時。爲御醫。班至法印。號春臺院。弱而遊于活所之門。與坦菴存菴諸老相友善。性耽墳史。多置奇書。旦夕繙閱。手施丹鉛。至老不已。嘗曰。身無官繫。置園百畝。藏書千卷。吾願足矣。善詩。慕白傅陸翁之躅。尤務鍛煉。每一首成。頻頻改潤。不穩不已。晚與篤所。蘭臯諸人。會集閱二十一史。逐月六次。不避寒暑伏膺。中歲後識先子。時時折柬相邀。嘗裁書寄先子。戒以姑狗時好。不陽倡古道。又錄戒目數條。如好色贖貨驕慢褊急等類。以自律。嘗告人曰。當世人全不犯此律者。伊藤半而

已。先子病篤。輿病來問。勉予諄至。是歲八月逝。壽八十二。其後世善繼。皆顯達于時。

安東守約

號省菴。世仕于筑後柳川鎮。爲立花家舊臣。夙遊學造都。受業于松永氏之門。善屬文爲時宗匠。萬治二年。明遺老朱之瑜。抗仲連之志。航海抵埼。無人賙卹。守約聞其文行。割俸半廩之者有年。之瑜後爲常藩所羅致。待以上賓。以壽終。守約服心喪。輯其遺文。曰心喪集語。有三卷。山陰張斐。舜水鄉人也。□□中來于長埼。欲面省菴叙謝。拘于國制。不得邂逅。手簡往來者有二卷。省庵夙服先子之名行。遠通書音。又使其門人片岡宗純。上都就學。八十餘而終。子守直。字元簡。世濟其美。孫守經。嘗遊學在都。

木村重

字宗節。世爲江右土豪。其先任筑後守。隸佐佐木氏麾下。食數邑。至重□業醫。來京師學于先子。素負氣節。其子重□又從先子學。孫重經從予學。與

篤所有契。篤所之從先子。因宗節云。

山本良延

號恬庵。住京師。爲高貲戶。性耽墳素。兼好倭歌。素信先子之學行。又遊于坦庵之門。

小河成章

字伯達。稱茂七郎。別號立所。父省宇與先子友。使二子從學。成章夙有器局。力學多年。不務記覽。斐然有文。及門之士。推爲高弟。旁通世務。處畫有方。又往來舅氏存庵之家。兼曉方劑。親故之間。有疾病事故。必就延請。衆所倚賴。初隨父隱居于北野。逮壯寓京。私塾授徒。倡明古學。遂東遊江戶。寓于上野。食常藜之祿。元祿丙子年。休官還京。途感河魚之疾而終。年四十八。妻井上氏。先子之甥也。無子。弟成材。

小河成材

字茂輔。號弘齋。天資朴直。不染世習。甫九歲。父省宇携入先子之室受學。

居北野。相距八九坊。路岐易迷。省宇乃圖寫街巷紆旋之狀。令懷以進學。相從五十年。篤信先子。一嘖一笑。奉爲模則。一生不偶無室。享保□年歿。年七十二。其歿。家無僮婢。篋無資財。餘故書數十篋而已。

有馬良及

字史闕。號存庵。其先有馬人。父玄哲。正親帝時叙醫官爲大醫。良及少壯以術鳴于都下。天資豪蕩。不拘名檢。學于活所之門。與坦庵冬嶺交熟。不甚治經。亦深信先子之學行。先子亦信其治術。天和中先子患痢疾。殆至危篤。請存庵治療。乃與芍藥湯。頓獲平痊。時無貴賤。仰其治術。貞□中。後西院弗懌。坐奉診失時。籍沒其產。廢錮終身。居鴨川湄。後寓大坂。號臥雲。以茗飲聲樂自遣。□□中七十許歲而終。子恭安。孫宗函。

緒方維文

字宗哲。京師人。幼而俊爽。有奇童之名。遊于老圃坦庵之門。後從先子遊。善隸書。兼工詞藻。壯年之後。仕于土佐。掌文學講讀事。間年赴任者四十餘年。

土州人士。知先子學行。維文爲之倡。休告在都。時時招先子及冬嶺篤所諸友。文字從容。每至輿酣。享保八年。終于京師。壽七十八。易名曰謙光先生。子維集。

原永貞

號雲庵。其父事松平總州侯。後休官爲醫。永貞青年有巧思。基品甚高。少治醫術。籍于和氣氏之門。精究青囊之業。治有見識。以善治傷寒有名。初學于遯庵。後從先子遊。尊信特甚。服其卓見。天資率直少文。不肯詭隨。及晚年其術始大行。享保初元終于京師。壽七十四。子善長。

平井德建

字春益。本濃州室原人。本姓安福氏。名瑞雲。上都學于遯庵。受醫術于時大醫道策法印之門。爲得壽院春澤之僭。遂冒其姓。方後西院時。爲內醫。甚被眷注。後仕于紀藩。初不由紹介。投刺踵門。甚信先子之道。時時爲人誘說。勸其服膺。□□中終。壽七十。□號東川。子春澤。春城。皆師事先子。於予

往來者。已三世矣。

北村可昌

字伊兵衛。號篤所。江州江部莊之土豪。夙好讀書。遊京周旋于諸儒之間。後師事先子。草定古義。多其筆授。推爲高弟。博物洽聞。有記覽之名。人以爲書淫。州郡屢有徵聘不偶。在京四十餘年。搢紳之間。多所親遇。近道諸鎮。或被禮待。晚歲與冬嶺蘭臯等諸人。會集閱史。青衿之士。多所造就。談吐爽快。議論風生。語朝儀。知世變。聽者忘倦。社中會集。必虛左迎之。至曰無車公不樂。正德辛卯歲。接朝鮮學士李穡等。詞翰往來。上皇嘉其華圖且宿學。賜絹綿并琉球研以寵之。享保三年七月終。壽七十二。友人私謚曰文英先生。搢紳家捐資營禍。參議韶光卿勒詞。弁光榮朝臣書字。人以爲美談。子可憲。

平井惟一

號友軒。京師人。與先子居止接近。壯而執弟子禮。遊江戶。受醫業于井關氏

之門。仕勢州久居藤堂侯。後專任儒職。篤信先子之道。倡明古學。風聲一方。先子困窮。屢屢周急。人以爲難。子玄龍。世業有學。

桂芳

初字元忠。後稱仁右衛門。丹州穗津之士族。躡冠上都。從先子遊。崇信最篤。遊江戶。仕小出備前侯署儒職。兼知民事。侯歿。歷三主無嗣。國除。仕井上河州侯。以文學之任見器遇。夙服先子之道。爲人演說。有化導之功云。

石河咸倫

稱文助。初稱三左衛門。其先在豐臣公時。以武功受土。爲時顯人。其後世住京師。咸倫少仕于出雲。後罷仕。造京肄業。遊三宅氏中江氏之門。兼師先子。隱于嵯峨大覺寺側。後爲伊賀藤堂侯所徵。署學職。與篤所友軒諸人友善。亦篤志人也。

八尾正守

稱彌平次。出于丹州柏原。在京師有志行。時已稱宿儒。與換軒米川損軒具原

諸老相追隨。又崇信先子。後遊江戶。寓止有年。遂奉神道。

濱田善長

字整夫。稱文四郎。勢州之產。本國司之裔。壯歲志學。遊于京師。時省庵因事在京。善長服其學行。不待促裝。便隨赴柳川。後寓于京師。事先子尊信甚至。遂遊江戶。爲稻葉石州諸公所禮遇。□□年中卒。年七十餘。亦有志之人也。芥河時敏

字修安。本備後人。弱齡上都。寓亞相隆眞卿家。從先子學。遂爲醫師丹水子後。宦遊江戶以術鳴。諸侯卿士多所引接。深信先子之道。講究古學。爲人演繹化誘爲多。享保八年終。年八十。其子時亨。字元泰。世其業。今爲東武醫官。世爲輪王親王所親遇。

井川元春

京師人。針科。先子常請針治。雖無才學。素信先子爲眞儒。其族善六。亦崇敬先子。

田代雲碩

醫人。本因州人。先子常信其術。請藥治。時有前羽及伯。亦請醫療。存菴門人也。

近藤養元

住京師。世以瘍疽名家。壯歲從先子學。善隸書。端正有法。後罹心恙。不永其天。亦謹厚人也。

松村昌菴

京師人。信從先子。住坊中。終身不室。蒔花灌園以自樂。亦善書。

那波祐英

稱九郎左衛門。活所之族。世住京師。以賢雄于鄉里。嘗信先子之學行。與坦菴。冬嶺。篤所諸老師友。好詩。號蕉窓。又號古峰。

水野慶雲

號秀嶺。世爲瘍科。住京師。後食膳所本多侯之祿。有才藻能書。

西谷道室

其先江戶人。住京師。家素豪。從先人學。尊信之篤。不異古聖賢。居止接近。古義初脫藁。先子就其宅講討修定。勸人爲學。使子弟師先子。元祿中終于長崎途中。中島義方其婿也。

山我宗敬

本佐渡人。住京師業醫。後束髮爲儒。改名甚七。篤信先子之道。與西谷氏有親契。

朝倉如圭

本越前斯波之家臣。父曰茂入。有四子。皆從先子遊。如圭其長子也。天資英敏。少小已有老成之風。延寶初歿。年纔踰冠。人惜其秀而不實。秀弟景暉有才學。今仕伊賀藤堂侯。署學職。

依田某

稱源三郎。本土族。家京師。性淳實。年踰強仕而未學。始入先子之門。親授

念書。歸則傳其子。先子常稱其篤志。子秀悅事。中川侯。

山口勝隆

字善右衛門。大內義隆七世孫。壯歲仕膳所本多侯爲長臣。罷仕僑寓于伏見。爲青山大膳侯所知遇爲館賓。世武弁。素無文才。深信先子之道。最親厚。晚歲號野哉翁。

坂口立益

號春水堂。以醫術事青山大膳侯。老成重厚。諳練庶務。與先子交。雖不頻。類會集。相識最久。齒踰九秩而終。子元郁世其祿。

伊藤基之

初名光任。稱五郎右衛門。世貫于京爲富戶。好和歌善書。周旋于雅章。通茂諸公之間。聽其指授。篤信先子。服事終身。人稱其謹篤。後曰淳篤。

荒木原泉

名重篤。本土族。世住于□□坊。其家以善釀聞。弱而從八尾正守遊。天資豪

宕。不事生產。晚年業醫。深信先子。崇敬不息。癸丑之災。古義脫蕪。先子
藁而逃。重篤率先諸人。挾眉尖刀。擁衛而行。

宇都宮由的

號遜菴。吉川家之世族。初從松永氏爲高弟。後僑寓京師。教授生徒。學徒雲
集。四書小學近思錄等書。凡數十部。學子必讀者。多加標注。爲世所珍。天資
篤厚。君子人也。芸菴東川皆出其門。故與先子交。時通書音。其子文甫嗣其
祿。孫由己肄業在京。從子遊。

真瀨善長

字朴元。延壽院道三之族。祖曰伯元。事賀藤肥後侯。有醫名。幼而英悟。有
神童之譽。從先子學。才超等輩。及志學年。隨父壽元往江戶。不偶歸京。踰
冠而終。弟友賢。字道元。亦事先子。

生島春竹

字子直。其先出八條親王家司。父曰玄隆。爲醫屬延壽院門。後仕土州。春竹

夙有_二才器_一。師事先子。父歿襲其祿。未幾而歿。子玄暉肄業在京。今從子遊。奧溪以三

吉弘氏。豐後竹田管下奧溪人也。其先出大友家麾下。壯來京師。受一溪之傳。善醫。後隱于西京。寬園百畝。灌蔬栽藥以自樂。時有求藥者與之。素豪飲。時招袞賓朋。觴詠寄興。中歲聞先子之名行。屢招致。則三好翁。土左將監等諸人必來焉。□□中九十餘而終。子東三世其業。

三好安宅

長慶之裔。生于南紀。天資坦率。不修邊幅。壯歲東遊不偶。強仕來京。隱居于一乘寺詩仙堂者。三十餘年。臺笠芒屨。造于公卿之門而不辭。人許其朴直。中歲之後。與先子交。服其行義。時時招致。會于詩仙堂。寄傲于山水樹竹之間。

美馬善平

失名。初名友賢。產于阿州。業醫。爲本州醫官。夙從操軒楊齋諸老遊。研

究考亭之旨。遂署儒職。

美馬某

稱清兵衛。善平之弟也。嘗受業于惕齋有年。亦聞先子之說。服其言論。阿州人士信古學。善平伯仲爲之倡云。

菅谷某

稱太次兵衛。參州鳥原邑人。世農家。天資謹篤。嘗用力居敬之學。及耆年聞先子之倡古學。百舍重趼。不由紹介。芒屨踵門。信仰殊篤。暫舍於旁側。日夕講摩。既歸。時時造京。屢質疑滯。勸親眷及旁近村落。讀書就學。翕然成俗。亦有志人也。

壺井一安

本河內人。字一郎左衛門。久仕于肥前司稅所。老而上都。住西洞院。園亭有趣。嘗信先子之道。屢致招屈。至大耋而終。

長岡意丹

號菊堂。善醫。鳴于都下。自少壯好儒學。家蓄墳素。□□中八十餘而終。晚年與先子交。時時招致。特加禮貌。稍有信依之志。

宮原宗精

字又兵衛。肥後侯京師吏人也。從先子學。

兒玉重輔

字市右衛門。丹州柏原人。兄曰羽太六兵衛。共從學先子。有篤志。

辻達

號晚菴。因州人也。夙好學。為本州教官。著籍于林祭酒之門。多蓄典籍。晚年從先子遊。多所信依。

小野寺秀和

字重內。淺野內匠侯鎮播州赤穗。為京邸主務。屢從先子遊。時時招邀。意丹玄謙等諸人必至。亦篤厚人也。元祿中。侯有罪。賜死國除。遂改姓名。潛蹤于坊市之間。□□年與同案遺臣四十七人。捨生敵愾。克成舊主之志。口碑藉

藉。不復詳焉。

北山惟明

字元允。大坂人。學醫術于北山壽庵。受儒業于先子。殊極崇信。未強仕而終。山本通春

字紀內。父曰春正。世家京師。善和歌。士庶之間。推爲宗匠。通春亦能和歌。遊江戶。後歸京。信依先子。奇書秘錄。多所謄寫。

惠藤一雄

字太助。京師人。中年捨業勤學。服事先子。素好和歌。兼授生徒。

井原道閱

筑前仕家之子。後住京師。以講素難爲業。天資重厚。深信先子之道。時旣老。執弟子禮。服事終身。講書之次。時演先旨。以授門人。亦豈弟人也。享保中卒。年七十餘。

長谷川涼圓

京師醫人。出于有馬氏之門。先人屢請求治。亦篤實人也。

岡部玄謙

字致恭。八幡人。本字治大路氏。爲大醫廣濟院玄哲之贅婿。昌其姓。久從學先子。有好古之癖。書畫器物。多藏于家。

鴻池宗二

大坂人。以豪聞。中歲寓于京師。事先子。崇信殊篤。先子歿。門人捐資營碣。宗二助築其階塾。

鳥井正圭

字廷達。家世儒素。父某爲桑名教官。事三宅正堅。正圭弱有異質。早孤。依于津城一巨室。上都師先子學。善屬文有理致。後館穀于菊亭內府伊季公家。爲諸公子伴讀。素多病。未壯而隕。

戶村愛忠

字摠石衛門。爲三浦侯長臣。素嗜學。時造京。必訪先子之家。質疑請益。其

在國。事上泄下。多所匡益。享保八年終。

小出重年

初名重元。字彌左衛門。世爲青山大膳侯長臣。在尼崎。竿牘問遺。屢請規益。嘗題先人遺書曰。不由此書。不得入聖門。

三浦爲安

號養安。世爲井伊侯家臣。致仕住京師。周旋于搢紳之間。好爲詩。從先子學。與篤所。浮山友善。晚年復國受俸。

稻義

字宣義。稱若水。父曰恒軒。爲永井信州掌醫。夙從先子。往來于惕齋。懶齋之間。有博物之名。著庶物類纂一千卷。宦于賀藩而終。

畑集庵

世住丹州柏原。業醫。篤信先子。使其子德基寓學于塾。書問頻頻。謂不讀先子之書。學者無下手之所。

岡部養竹

仕于越前福井。父曰高伯。世爲良醫。少遊于京師。寓于坦菴塾。兼學于先人。尤著謹篤之名。

味木道印

初名松仙。字治人。深信先子之道。後學醫術于延壽院之門。終于江戶。初在。字治。招先子。淹留數日。中島菅谷等諸人從行。予舞勺之年亦與焉。

渡邊榮

字元安。日州延岡人。父曰正安。篤厚人也。世仕于本鎮有馬侯。榮踰冠遊京。入先子之室。習刀圭于存菴。與成章友善。後罹癱瘓之疾而廢于家。

武部道節

醫人也。受業于廣濟院。亦從學先子。

大須賀快庵

名德純。先人之姨夫也。京師人。世醫家。父曰某。慶長中。上皇弗懌。診御脈。

著率直之名。德純不失世守。以善醫聞。仕于小倉小笠原侯。□□中島原之役。選從軍中。後退隱于京師。素有學行。先子師事之。嘗草中庸解。招德純觀。純大嘉歎。以爲不可及也。八十餘歲而終。予幼時尚及識之云。亦君子位中人也。

僧道香

住豐州中津寶蓮坊。夙窮玄理。兼耽儒學。時省菴損軒爲海西大儒。皆其所親接。貞享中來京師。造先子廬。深信其學行。謂學者不通佛氏之說。則不能識先儒之說。自佛氏出。及其還。先子作序贈之。

飯田棟隆

字玄泉。其先信州名族。隸于延壽院門下學醫。世住京師。甚有能名。晚年信先子之道。先子疾革。亦請其治療。享保□年卒。其子玄頤屬予銘碣。

中江一貫

字快安。伊賀人。瀧川之裔也。夙遊京師。從學先子。四十餘年。深究經理。剖

析先儒之紕繆。著理氣辨。四書辨論等書若干卷。後教授于大坂。攻苦茹淡。終身不變。享保中罹心恙而終。年七十二。予亦碣其墓云。

中島義方

字正佐。京師人。西谷翁之婿也。弱齡師事先人。古義發揮等書。多其所草定。州郡雖有徵辟而不遇。中歲寓□□坊。教授生徒。三十餘年。著錄幾千人。享保十二年卒。年七十。門人私諡曰文節先生。

木村立

字信甫。羽州秋田之產。父兄皆以醫術仕于佐竹侯。立遊學京師。師事先人。崇信尤篤。既歸。東牘往來。問遺質正。三千里之阻。猶咫尺也。羽人嚮古學。皆其所倡。享保己酉七十餘歲而終。號松軒。

先游傳終